

**DEKLARASAUN KONJUNTU SOSIEDADE SIVIL RELASAUN HO OPERASAUN
KONJUNTU PNTL NO F-FDTL BA IMPLEMENTASAUN REZOLUSAUN PN no. 5/2014
HO REZOLUSAUN KONSELLU MINISTRUS No. 8/2014**

22 Abril 2014

Nu'udar ita hotu hatene katak, bazeia iha Rezolusaun Parlamentu Nasional No.5/2014 kona-ba 'grupu ilegal' sira, ne'ebé fó sai iha dia 3 Marsu 2014, Polisia Nasional Timor-Leste (PNTL) halo ona atuasaun ba grupu Konsellu Popular Demokrátiku-Repúblika Demokrátiku de Timor-Leste (CPD-RDTL) no grupu Konsellu Revolusaun Maubere (KRM) iha distritu 13.

Durante tempu ne'e ita hare katak, PNTL halo sosializaun kona-ba konteúdo rezolusaun número 5/2014 no mós halo atuasaun ba sede grupu CPD-RDTL iha Territóriu Timor laran tomak hodi losu ai-riin bandeira, hatún bandeira, rekolla farda, rekolla dokumentus CPD-RDTL no rekolla mós kartaun membru CPD-RDTL, nune'e mós halo kapturasau ba lider KRM nian no halo operaun hodi bolu hikas membru sira ne'ebé halai ba fohó Matebian hodi lori ba hasoru Justisa. Tuir monitorizaun NGO nian hatudu katak durante atuasaun ne'e maioria membrus grupu CPD-RDTL no KRM entrega an no mós entrega atributus sira no halo koopera di'ak tebes ho PNTL iha distritus 13 iha Timor-Leste.

Maske nune'e hare ba katak, konflitu ida ne'e involve komunidade rihun ba rihun no relasaun ho konflitu pasadu nian. Tan ne'e presiza esforsu integradu ida hodi reintegra sira ba komunidade no prevene akontesimentu hanesan iha futuru mak ami husi sosiedade sivil hato'o Preokupasaun no Ezijensia hanesan tuir mai ne'e:

1. Ami husi Sosiedade Sivil preokupa tebes ho Rezolusaun rua husi estadu ba KRM no CPD-RDTL. Ami hanoin katak se ema ruma halo krime inklui membru husi organizasaun rua ne'e bele kaer sira lori ba justisa, maibé labele uza prizaun preventiva nudár substitui ba justisa iha tribunal. Timor-Leste iha kódigu penál no tuir Konstituisaun RDTL, krime ba kondena ema privadu ka indivídu la'ós grupu tomak. Timor-Leste iha nia kódigu penál tanba ne'e bele uza ba kondena ema halo krime la'ós desizaun político hanesan rezolusaun sira agora nian ne'ebé político sira mak deside.
2. Preokupa katak rezolusaun agora nudár presidente ka toman ladi'ak ba futuru katak estadu bele aplika mós ba grupu komunidade seluk ka balun iha ita nia rai ne'ebé diferente ho político governu ka estadu nia mós bele halo rezolusaun tuir Polítiku sira nia hakarak hodi taka ho políticamente (halo rezolusaun) la tuir lei no sistema justisa mak vigora iha ita nia rai.
3. Ami hanoin katak sidadaun hotu iha liberdade espresaun bazeia ba Konstituisaun, kódigu penál no konvensaun internasional sira ne'ebé TL deside nudár lei doméstiku ita nia. Sidadaun ida bele organiza malu iha grupu hodi ko'alia de'it ba públiku seidauk halo krime ne'e laiha dalan atu kondena sira hanesan saida mak político sira hanoin no halo agora. Ami mós hanoin lei la obriga sidadaun sira tenke lori kartaun eleitorál ba fatin públiku sira tanba ne'e operaun ne'ebé halo check point ba povu nia kartaun eleitorál ne'e la tuir Lei.
4. Maske nune Ami husi Sosiedade Sivil hakarak hato'o Parabens ba eis membru CPD-RDTL sira hotu ne'ebé hatudu ona nia maturidade hodi koopera di'ak tebes ho PNTL no F-FDTL hodi entrega an, entrega atributu no sasan kroat hotu hodi kumpri lei no reintegra hikas sira nia an ba komunidade. Ida ne'e nudar simbolu ita bo'to sira nia hadomi ba povu no NASAUN LIU kontribui ba estabilidade Timor Leste.
5. Ami mós hakarak hato'o ba PNTL no F-FDTL ne'ebé hatudu tiha ona nia profesionalismu iha operaun konjuntu ida ne'e. Maske nune ami Ejiji nafatin ba PNTL no F-FDTL ne'ebé halao operaun iha Baguia, Quilicai no Laga no fatin seluk atu halo atuasaun ho profesional nafatin, tane a'as diretus humanos povu terus nai'n ida nian.
6. Ejiji ba Sua Excelencia Presidente Repúblika nu'udar orgaun ne'ebé iha papél atu garante unidade nasional no estabilidade nasional atu dezenvolve estratejia diálogo nacional ba ema rezistensia no veteranu sira, facilita rekonsiliaisaun entre funu nai'n sira ba diverjensias politika sira ne'ebé akuntese durante rezistensia nian. Ida ne'e importante atu prevene akontesimentu hanesan iha futuru.

Realidade hatudu katak, durante ne'e ita nia estadu promove deit rekonsiliaun ba inimigu ukun rasik an nian hodi haluha tiha rekonsiliaun entre funu nai'n sira hodi kauza polemika sira hanesan CPD-RDTL, KRM no selseluk tan.

7. Ejiji ba veteranu, kombatentes libertasaun nasional sira hotu atu kontinua hatudu ita bo'ot sira nia heroismu atu la monu ba lasu politika ohin loron nian. Ami espera atu veteranu tenki sai heroi nafatin hodi tane a'as povu no martires sira nia mehi ne'ebé ita bo'ot sira mós kontribui tiha ona hodi liberta katak "Ukun rasik An no Moris Diak".
8. Ejiji ba Tribunal atu halao prosesu justisa tuir kódigu penál no tuir konstituisaun RDTL katak krime ba kondena ema privadu ka indivídu la'ós grupu tomak. Tribunal tenki hala'o nia mandatu ho independente atu labele kondena ema tuir dalam política nian, katak labele uza prizaun preventiva hodi substitui ba justisa iha tribunal.
9. Ejiji ba Governu atu organiza planu integradu ba reintegrasaun eis membru CPD-RDTL, KRM no selseluk tan ba sira nia komunidade. Planu reintegrasaun ida ne'e importante hodi evita konflitu komunitáriu hafoin operasaun konjuntu PNTL no F-FDTL. Planu integradu ida ne'e inklui fasilita diálogu ho membrus komunidade iha Distritus atu bele hamenus tensaun no rumores liu husi klarifica pozisaun governu, diskuti papel sidadaun no estadu, no identifika konfusaun ne'ebé mósu relasiona ho operasaun bazeia ba rezolusaun no 5/2014.
10. Ejiji ba Parlamentu Nasional atu debate relatorio Chega! no implementa rekomendasau sira Chega! nian hodi hametin rekonsiliaun entre Timoroan relasaun ho konflitu ne'ebé akuntese iha pasadu. Nune'e mós atu aprova lei instituisaun memoria hafoin CAVR, lei rai no lei reparasaun ba vitima ne'ebé sei kaduka hela iha Parlamentu.
11. Ejiji ba ba Sosiedade Sivil no Igreja Katolika no lider religiozus atu hatudu nia papel nu'udar orgaun intermediariu no independenti hodi kontinua hametin konfliansa ba komunidade no politiku sira bele fasilita dialogu ba konflitu sira ne'ebé mósu iha ita nia sosiedade.
12. Ejiji mós ba Prvvedoria Direitus Humanos e Justisa (PDHJ) atu halo monitorizasaun ativu iha asuntu direitu humanus nian durante implementasaun Rezolusaun no operasaun konjuntu PNTL no F-FDTL nian iha baze.
13. Sociedade Civil mos prontu hodi halo monitoizasaun ba operasaun konjunta ne'e atu asegura katak operasaun ne'e respeitu direitus humanus ba ema hotu.

Ami ne'ebé halo Deklarasaun:

1. Belun
2. Fundasaun Mahein
3. Ba Futuru
4. La'o Hamutuk
5. ETCRN (East Timor Crisis Reflection Network)
6. TLMDC (Timor-Leste Media Development Centre)
7. Forum Tau Matan
8. Ita Ba Paz
9. NGO Forum
10. Rede Feto Timor-Leste

Asina tan hafoin deklarasaun fó sai ona:

11. Asosiasaun HAK
12. Judicial Systems Monitoring Programme (JSMP)
13. CEPAD

(Iha konfusaun uitoan kona-ba se mak asina deklarasaun ida ne'e. Tuir Belun, lista iha leten los duni iha loron 8 Maiu 2014.)